



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

25.05.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-ԱՄ-2017/04

Հայաստանի Հանրապետության գնումների բողոքարկման խորհրդուրդը (այսուհետ նաև՝ Խորհուրդ) ուսումնասիրելով Հայաստանի Հանրապետության ֆինանսների նախարարության 02.05.2017թ. թիվ 03/73-3/7522-17 և 03/73-3/7523-17 գրություններով «Պրոֆիլայն Էռ Էմ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը

ՀՀ ֆինանսների նախարարությունը, ՀՀ դատական դեպարտամենտի 30.03.2017թ. թիվ Ե-2139 գրության հիման վրա, 02.05.2017թ. թիվ 03/73-3/7522-17 և 03/73-3/7523-17 գրություններով ՀՀ գնումների բողոքարկման խորհրդում նախաձեռնել է «Պրոֆիլայն Էռ Էմ» ՍՊԸ-ին (այսուհետ նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ նաև՝ Ցուցակ) ներառելու պաշտոնական ընթացակարգ:

2. «Պրոֆիլայն Էռ Էմ» ՍՊԸ-ի ներկայացրած փաստարկները և դիրքորոշումը.

Ընկերությունը, պատշաճ ծանուցված լինելով Խորհրդի 11.05.2017թ. ժամը 15:35 նիստի վերաբերյալ, ապահովել է իր ներկայացուցչի մասնակցությունը, ով հայտնել է, որ Ընկերության կողմից ներկայացվել է ոչ թե արտադրողի, այլ պաշտոնական ներկայացուցչի կողմից տրված նամակ-հավաստագիր այլ լեզվով, սակայն ընթացակարգի գնահատող հանձնաժողովը որակավորման չափանիշները հիմնավորող փաստաթղթերում առկա անհամապատասխանությունը շտկելու մասին ծանուցման մեջ նշվել է միայն, որ համապատասխան փաստաթուղթը պետք է ներկայացվի հայերեն լեզվով, սակայն չի նշվել, որ ներկայացված նամակ-հավաստագրի մեջ նույնպես առկա է անհամապատասխանություն, քանի որ այն տրված չէ արտադրողի կողմից և որպիսի անհամապատասխանությունն անհրաժեշտ է շտկել: Ուստի Ընկերությունը խախտում թույլ չի տվել: Ընկերության ներկայացուցիչը հայտնել է նաև, որ Ընկերությունն արդեն իսկ տիրապետում է արտադրողի կողմից տրված նամակ-հավաստագրին, որը կարող է ներկայացնել Պատվիրատուին:

3. ՀՀ դատական դեպարտամենտի կողմից ներկայացված փաստարկները և դիրքորոշումը.

ՀՀ դատական դեպարտամենտը 30.03.2017թ. թիվ Ե-2139 գրությամբ ներկայացրել է ՀՀ դատական դեպարտամենտի կարիքների համար համակարգչային և պատճենահանման սարքավորումների և օժանդակ նյութերի ձեռքբերման նպատակով կազմակերպված «ԴԴ-ՇՀԱՊՁԲ-15/8-05/17» ծածկագրով ընթացակարգին վերաբերող անհրաժեշտ փաստաթղթերը:

Պատվիրատուն, պատշաճ ծանուցված լինելով Խորհրդի 11.05.2017թ. ժամը 15:35 նիստի վերաբերյալ, ապահովել է իր ներկայացուցչի մասնակցությունը, ով հայտնել է, որ Ընթացակարգի գնահատող հանձնաժողովը, մերժելով Ընկերության հայտը, գործել է իրավաչափ, քանի որ Ընկերության կողմից ներկայացված որակավորման չափանիշները

հիմնավորող փաստաթղթերը չեն համապատասխանում հրավերի պահանջներին: Մասնավորապես, հրավերով պահանջվել է ներկայացնել նամակ-հավաստագիր՝ տրված արտադրողի կողմից, սակայն Մասնակցի կողմից ներկայացված նամակ-հավաստագիրը համապատասխան չափաբաժինների մասով նոտարական կարգով վավերացված չի եղել, իսկ այլ չափաբաժինների մասով ներկայացված համանուն փաստաթուղթը տրված չի եղել արտադրողի կողմից:

3. ՍՑ-ԱՄ-2017/04 պաշտոնական ընթացակարգի քննության համար էական նշանակություն ունեցող փաստերը

ՍՑ-ԱՄ-2017/04 պաշտոնական ընթացակարգի քննության համար էական նշանակություն ունեն հետևյալ փաստերը՝

1. ՀՀ դատական դեպարտամենտի կարիքների համար համակարգչային և պատճենահանման սարքավորումների և օժանդակ նյութերի ձեռքբերման նպատակով կազմակերպվել է «ԴԴ-ՇՀԱՊՁԲ-15/8-05/17» ծածկագրով ընթացակարգ:

2. Ընթացակարգի հրավերի ՄԱՍ II-ի 3-րդ կետը սահմանում է հետևյալը.

«3.1 Սույն հրավերով նախատեսված որակավորման չափանիշները հավաստելու և սույն հրավերի 4.3 կետով նախատեսված տեղեկատվությունը տրամադրելու համար առաջին տեղ զբաղեցրած Մասնակիցը Պատվիրատուի՝ ddgnumner@mail.ru էլեկտրոնային փոստին է ուղարկում սույն հրավերի 5-րդ հավելվածով նախատեսված գրությունը, որին կցվում է

ա) առաջարկվող ապրանքի անվանումը և տեխնիկական բնութագրերը.

բ) նախկինում՝ հայտը ներկայացնելու տարվա և դրան նախորդող երեք տարվա ընթացքում, պատշաճ ձևով իրականացրած համանման (նմանատիպ) առնվազն մեկ պայմանագրի պատճենը, ընդ որում՝ նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի

շրջանակներում Մասնակցի ներկայացրած գնային առաջարկի հիսուն տոկոսից, որից առնվազն մեկ պայմանագրի շրջանակներում մատակարարված ապրանքների ծավալը գումարային արտահայտությամբ, պակաս չէ տվյալ գնման ընթացակարգի շրջանակներում Մասնակցի ներկայացրած գնային առաջարկի քսան տոկոսից, իսկ դրա պատշաճ կատարումը գնահատելու համար՝ տվյալ պայմանագրի կողմերի հաստատած՝ պայմանագրի սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

3.2 Հայտում ներառված բոլոր կնքված փաստաթղթերը պետք է ստորագրված լինեն կնքողի կողմից:

3.3 Հայտում ներառվող բնօրինակ փաստաթղթերի փոխարեն կարող են ներկայացվել դրանց նոտարական կարգով վավերացված օրինակները:»:

3. Ընթացակարգի հրավերին կից պայմանագրի նախագծի թիվ 1 հավելված տեխնիկական բնութագրով (այսուհետ նաև՝ Տեխնիկական բնութագիր) Ընթացակարգի 2-րդ, 9-րդ, 14-րդ, 15-րդ, 17-րդ չափաբաժինների մասով նախատեսվել է, **որ մատակարար ընկերությունը պարտավոր է ներկայացնել նամակ-հավաստագիր արտադրողի կողմից, որը թույլ է տալիս մատակարարին պաշտոնապես ներկրել տվյալ փոշին (տոներ) Հայաստանի Հանրապետություն:**

4. ՀՀ դատական դեպարտամենտի կարիքների համար համակարգչային և պատճենահանման սարքավորումների և օժանդակ նյութերի ձեռքբերման նպատակով կազմակերպված «ԴԴ-ՇՀԱՊՁԲ-15/8-05/17» ծածկագրով ընթացակարգին մասնակցելու նպատակով, ի թիվս այլ մասնակիցների, հայտ է ներկայացրել նաև «Պրոֆիլայն Էո Էմ» ՍՊԸ-ն:

5. Ընթացակարգի գնահատող հանձնաժողովի 16.03.2017թ. ժամը 12:00-ի նիստի թիվ 6 արձանագրության 3-րդ կետով «Պրոֆիլայն Էո Էմ» ՍՊԸ-ն ճանաչվել է 1-ին տեղ զբաղեցրած մասնակից Ընթացակարգի 2-րդ, 13-րդ, 14-րդ, 19-րդ, 28-րդ, 37-րդ չափաբաժինների մասով, իսկ 28.03.2017թ. ժամը 11:00-ի նիստի թիվ 8 արձանագրությամբ կայացված որոշմամբ՝ Ընթացակարգի 15-րդ չափաբաժնի մասով և

սահմանված կարգով ծանուցվել է որակավորման չափանիշները հիմնավորող փաստաթղթերը սահմանված ժամկետում ներկայացնելու անհրաժեշտության վերաբերյալ:

6. Ընթացակարգի գնահատող հանձնաժողովը 24.03.2017թ. ժամը 11:00-ի նիստի թիվ 7 արձանագրությամբ արձանագրել է, որ «Պրոֆիլայն Էռ Էմ» ՍՊԸ-ի կողմից ներկայացված տեխնիկական բնութագրում բացակայում է հրավերով սահմանված նամակ-հավաստագրի պահանջը: Ընկերության նամակ-հավաստագիրն անհրաժեշտ է ներկայացնել հայերեն լեզվով կամ դրա նոտարական կարգով վավերացված օրինակը: Ուստի Ընթացակարգի գնահատող հանձնաժողովը մեկ աշխատանքային օրով կասեցրել է նիստը՝ Ընկերությանը ծանուցելով մեկ աշխատանքային օրվա ընթացքում արձանագրված անհամապատասխանությունը շտկելու վերաբերյալ:

7. Ընթացակարգի գնահատող հանձնաժողովը 28.03.2017թ. ժամը 11:00-ի նիստի թիվ 8 արձանագրությամբ կայացրած որոշմամբ մերժել է Ընկերության հայտը Ընթացակարգի 2-րդ և 14-րդ չափաբաժինների մասով՝ այն հիմնավորմամբ, որ «Պրոֆիլայն Էռ Էմ» ՍՊԸ-ն սահմանված ժամկետում մասամբ է շտկել արձանագրված անհամապատասխանությունները, մասնավորապես ներկայացված նամակ-հավաստագիրը նոտարական կարգով վավերացված չէ:

8. Ընթացակարգի գնահատող հանձնաժողովը 05.04.2017թ. ժամը 10:00-ի նիստի թիվ 10 արձանագրության 2-րդ կետով արձանագրել է, որ «Պրոֆիլայն Էռ Էմ» ՍՊԸ-ի կողմից Ընթացակարգի 15-րդ չափաբաժնի մասով ներկայացված տեխնիկական բնութագրով սահմանված պահանջները հիմնավորող փաստաթուղթը չի համապատասխանում հրավերով սահմանված պահանջներին (նամակ-հավաստագիրը տրված չէ արտադրողի կողմից):

9. Ընթացակարգի գնահատող հանձնաժողովը 07.04.2017թ. ժամը 11:00-ի նիստի թիվ 11 արձանագրությամբ կայացրած որոշմամբ մերժել է «Պրոֆիլայն Էռ Էմ» ՍՊԸ-ի հայտը այն հիմնավորմամբ, որ Ընկերությունը սահմանված կարգով և ժամկետում չի շտկել արձանագրված անհամապատասխանությունը:

4.Խորհրդի հիմնավորումները և եզրահանգումը

Խորհուրդն, ուսումնասիրելով ՀՀ ֆինանսների նախարարության 02.05.2017թ. թիվ 03/73-3/7523-17 և 03/73-3/7523-17 գրությունները, ՀՀ դատական դեպարտամենտի 30.03.2017թ. թիվ Ե-2139 գրությունը և կից փաստաթղթերը, հայտնում է հետևյալը.

«Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 4-րդ կետի «ա» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, **եթե հայտը ներկայացնելու պահին նախորդող տարվա ընթացքում ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորություն, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:**

Նույն հոդվածի 3-րդ մասի համաձայն՝ մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող՝

- 1) մասնագիտական գործունեության համապատասխանություն պայմանագրով նախատեսված գործունեությանը.
- 2) մասնագիտական փորձառություն.
- 3) տեխնիկական միջոցներ.
- 4) ֆինանսական միջոցներ.
- 5) աշխատանքային ռեսուրսներ:

Օրենքի 31-րդ հոդվածի 5-րդ մասի 1-ին կետի համաձայն՝ առաջին և հաջորդաբար տեղերը զբաղեցրած մասնակիցներին որոշելուց հետո՝ հրավերով սահմանված ժամկետում առաջին տեղը զբաղեցրած մասնակիցը հանձնաժողովին է ներկայացնում իր՝ **գնումներին մասնակցելու իրավունքը և հրավերով նախատեսված որակավորման չափանիշներին համապատասխանությունը հիմնավորող՝ հրավերով նախատեսված փաստաթղթերը (տեղեկությունները):**

Օրենքի 48-րդ հոդվածի 6-րդ մասի 7-րդ կետի համաձայն՝ ՀՀ գնումների բողոքարկման խորհուրդն իրավունք ունի որոշում կայացնելու մասնակցին գնումների գործընթացին մասնակցության իրավունք չունեցող մասնակիցների ցուցակում ներառելու համար:

ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 35-րդ կետի 1-ին ենթակետի «գ» պարբերության համաձայն՝ հրավերով նախատեսվում է, որ մասնակիցը հայտով ներկայացնում է ապրանքների գնման դեպքում իր կողմից հաստատված հայտարարություն՝ առաջարկվող ապրանքի՝ հրավերով նախատեսված տեխնիկական բնութագրերին համապատասխանության վերաբերյալ, պայմանով, որ 1-ին տեղը զբաղեցրած մասնակից ճանաչվելու դեպքում ներկայացնում է նաև առաջարկվող ապրանքի անվանումը և տեխնիկական բնութագրերը:

Կարգի 47-րդ կետի 2-րդ ենթակետը սահմանում է, որ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով ծանուցում է առաջին տեղը զբաղեցրած մասնակցին՝ առաջարկելով երեք աշխատանքային օրվա ընթացքում **ներկայացնել որակավորման չափանիշները հիմնավորող՝ հրավերով նախատեսված փաստաթղթերը, իսկ ապրանքների գնման դեպքում նաև նույն կարգի 35-րդ կետի 1-ին ենթակետի «գ» պարբերությամբ նախատեսված փաստաթուղթը:** Նույն մասով սահմանված ժամկետում փաստաթղթերը չներկայացվելու դեպքում հանձնաժողովը մերժում է առաջին տեղը զբաղեցրած մասնակցի հայտը և փաստաթղթեր ներկայացնելու պահանջ է ներկայացնում հաջորդող տեղը զբաղեցրած մասնակցին:

Կարգի 51-րդ կետի համաձայն՝ առաջին տեղը զբաղեցրած մասնակցի կողմից փաստաթղթերն ամբողջական չներկայացվելու, ինչպես նաև ներկայացրած որակավորման չափանիշները հիմնավորող՝ հրավերով նախատեսված փաստաթղթերի, իսկ ապրանքների գնման դեպքում նաև նույն կարգի 35-րդ կետի 1-ին ենթակետի «գ» պարբերությամբ նախատեսված փաստաթղթի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին

տեղը զբաղեցրած մասնակցին առաջարկելով մեկ աշխատանքային օրվա ընթացքում շտկել անհամապատասխանությունը:

Կարգի 52-րդ կետի 2-րդ ենթակետի համաձայն՝ առաջին տեղը զբաղեցրած մասնակցի կողմից արձանագրված անհամապատասխանությունը սահմանված ժամկետում չշտկելու դեպքում հանձնաժողովի որոշմամբ հայտը մերժվում է և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

Ընթացակարգի հրավերով սահմանվել է, որ նույն հրավերով նախատեսված որակավորման չափանիշները հավաստելու և հրավերի 4.3 կետով նախատեսված տեղեկատվությունը տրամադրելու համար առաջին տեղ զբաղեցրած Մասնակիցը Պատվիրատուի՝ ddgnumner@mail.ru էլեկտրոնային փոստին է ուղարկում **նույն հրավերի 5-րդ հավելվածով նախատեսված գրությունը, որին կցվում է՝**

ա) առաջարկվող ապրանքի անվանումը և տեխնիկական բնութագրերը.

բ) նախկինում՝ հայտը ներկայացնելու տարվա և դրան նախորդող երեք տարվա ընթացքում, պատշաճ ձևով իրականացրած համանման (նմանատիպ) առնվազն մեկ պայմանագրի պատճենը, ընդ որում՝ նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի շրջանակներում Մասնակցի ներկայացրած գնային առաջարկի հիսուն տոկոսից, որից առնվազն մեկ պայմանագրի շրջանակներում մատակարարված ապրանքների ծավալը գումարային արտահայտությամբ, պակաս չէ տվյալ գնման ընթացակարգի շրջանակներում Մասնակցի ներկայացրած գնային առաջարկի քսան տոկոսից, իսկ դրա պատշաճ կատարումը գնահատելու համար՝ տվյալ պայմանագրի կողմերի հաստատած՝ պայմանագրի սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

Ընթացակարգի հրավերին կից պայմանագրի նախագծի թիվ 1 հավելված տեխնիկական բնութագրով Ընթացակարգի 2-րդ, 9-րդ, 14-րդ, 15-րդ, 17-րդ

չափաբաժինների մասով նախատեսվել է, որ մաքակարար ընկերությունը պարտավոր է ներկայացնել նամակ-հավաստագիր արտադրողի կողմից, որը թույլ է տալիս մաքակարարին պաշտոնապես ներկրել տվյալ փոշին (տոներ) Հայաստանի Հանրապետություն:

«Պրոֆիլայն Էռ Էմ» ՍՊԸ-ն ՀՀ դատական դեպարտամենտի կողմից կազմակերպված «ԴԴ-ՇՀԱՊՁԲ-15/8-05/17» ծածկագրով ընթացակարգին մասնակցելու նպատակով հայտ է ներկայացրել:

Ընթացակարգի գնահատող հանձնաժողովի 16.03.2017թ. ժամը 12:00-ի նիստի թիվ 6 արձանագրության 3-րդ կետով «Պրոֆիլայն Էռ Էմ» ՍՊԸ-ն ճանաչվել է 1-ին տեղ զբաղեցրած մասնակից Ընթացակարգի 2-րդ, 13-րդ, 14-րդ, 19-րդ, 28-րդ, 37-րդ չափաբաժինների մասով, իսկ 28.03.2017թ. ժամը 11:00-ի նիստի թիվ 8 արձանագրությամբ կայացված որոշմամբ՝ Ընթացակարգի 15-րդ չափաբաժնի մասով և սահմանված կարգով ծանուցվել է որակավորման չափանիշները հիմնավորող փաստաթղթերը սահմանված ժամկետում ներկայացնելու անհրաժեշտության վերաբերյալ:

Ընթացակարգի գնահատող հանձնաժողովը 24.03.2017թ. ժամը 11:00-ի նիստի թիվ 7 արձանագրությամբ արձանագրել է, որ «Պրոֆիլայն Էռ Էմ» ՍՊԸ-ի կողմից ներկայացված տեխնիկական բնութագրում բացակայում է հրավերով սահմանված նամակ-հավաստագրի պահանջը: Ընկերության նամակ-հավաստագիրն անհրաժեշտ է ներկայացնել հայերեն լեզվով կամ դրա նոտարական կարգով վավերացված օրինակը: Ուստի Ընթացակարգի գնահատող հանձնաժողովը մեկ աշխատանքային օրով կասեցրել է նիստը՝ Ընկերությանը ծանուցելով մեկ աշխատանքային օրվա ընթացքում արձանագրված անհամապատասխանությունը շտկելու վերաբերյալ:

Ընթացակարգի գնահատող հանձնաժողովը 28.03.2017թ. ժամը 11:00-ի նիստի թիվ 8 արձանագրությամբ կայացրած որոշմամբ մերժել է Ընկերության հայտը Ընթացակարգի 2-րդ և 14-րդ չափաբաժինների մասով՝ այն հիմնավորմամբ, որ «Պրոֆիլայն Էռ Էմ» ՍՊԸ-ն սահմանված ժամկետում մասամբ է շտկել արձանագրված անհամապատասխանությունները, մասնավորապես ներկայացված նամակ-հավաստագիրը նոտարական կարգով վավերացված չէ:

Ընթացակարգի գնահատող հանձնաժողովը 05.04.2017թ. ժամը 10:00-ի նիստի թիվ 10 արձանագրության 2-րդ կետով արձանագրել է, որ «Պրոֆիլայն Էո Էմ» ՍՊԸ-ի կողմից Ընթացակարգի 15-րդ չափաբաժնի մասով ներկայացված տեխնիկական բնութագրով սահմանված պահանջները հիմնավորող փաստաթուղթը չի համապատասխանում հրավերով սահմանված պահանջներին (նամակ-հավաստագիրը տրված չէ արտադրողի կողմից):

Ընթացակարգի գնահատող հանձնաժողովը 07.04.2017թ. ժամը 11:00-ի նիստի թիվ 11 արձանագրությամբ կայացրած որոշմամբ մերժել է «Պրոֆիլայն Էո Էմ» ՍՊԸ-ի հայտը այն հիմնավորմամբ, որ Ընկերությունը սահմանված կարգով և ժամկետում չի շտկել արձանագրված անհամապատասխանությունը:

Այսպես, Օրենքի 31-րդ հոդվածի 5-րդ մասի 1-ին կետի համաձայն՝ առաջին և հաջորդաբար տեղերը զբաղեցրած մասնակիցներին որոշելուց հետո՝ հրավերով սահմանված ժամկետում առաջին տեղը զբաղեցրած մասնակիցը հանձնաժողովին է ներկայացնում իր՝ ***գնումներին մասնակցելու իրավունքը և հրավերով նախատեսված որակավորման չափանիշներին համապատասխանությունը հիմնավորող՝ հրավերով նախատեսված փաստաթղթերը (տեղեկություններ):***

Օրենքի 5-րդ հոդվածի 3-րդ մասը հստակ սահմանում է այն որակավորման չափանիշները, որոնք պետք է ունենա մասնակիցը, դրանք են՝ մասնագիտական գործունեության համապատասխանություն պայմանագրով նախատեսված գործունեությանը, մասնագիտական փորձառություն, տեխնիկական միջոցներ, ֆինանսական միջոցներ, աշխատանքային ռեսուրսներ:

Կարգի 35-րդ կետի 1-ին ենթակետի «գ» պարբերությունը սահմանում է, որ 1-ին տեղը զբաղեցրած մասնակից ճանաչվելու դեպքում մասնակիցը ներկայացնում է նաև ***առաջարկվող ապրանքի անվանումը և տեխնիկական բնութագրերը:***

Ընթացակարգի հրավերով նախատեսվել է, որ հրավերի 4.3 կետով նախատեսված տեղեկատվությունը տրամադրելու համար առաջին տեղ զբաղեցրած մասնակիցը Պատվիրատուի՝ համապատասխան էլեկտրոնային փոստին է ուղարկում ***նույն հրավերի 5-րդ հավելվածով նախատեսված գրությունը, որին կցվում է՝***

ա) առաջարկվող ապրանքի անվանումը և տեխնիկական բնութագրերը.

բ) նախկինում՝ հայտը ներկայացնելու տարվա և դրան նախորդող երեք տարվա ընթացքում, պատշաճ ձևով իրականացրած համանման (նմանատիպ) առնվազն մեկ պայմանագրի պատճենը...

Վերլուծելով վերոհիշյալ նորմերը կարելի է եզրակացնել, որ Ընթացակարգի տեխնիկական բնութագրով նախատեսված՝ մատակարար ընկերության կողմից ներկայացվելիք արտադրողի կողմից տրված նամակ-հավաստագիրը չի հանդիսանում ոչ տեխնիկական բնութագիր և ոչ գնումներին մասնակցելու իրավունքը և հրավերով նախատեսված որակավորման չափանիշներին համապատասխանությունը հիմնավորող հրավերով նախատեսված փաստաթուղթ, ուստի և այն չի ներկայացվում Կարգի 47-րդ կետի 2-րդ ենթակետով նախատեսված կարգով և ժամկետում: Բացի այդ հրավերի Տեխնիկական բնութագրով ուղղակիորեն նշված է, որ արտադրողի կողմից տրված նամակ-հավաստագիրը ներկայացվում է **մատակարար ընկերության** կողմից, իսկ ՀՀ քաղաքացիական օրենսգրքի 521-րդ հոդվածի 2-րդ մասի համաձայն՝ մատակարարման պայմանագիրը կնքվում է գրավոր: Հետևաբար ընկերությունը կհամարվի մատակարար միայն սահմանված ձևով կնքված մատակարարման պայմանագրի առկայության դեպքում, ինչը ևս մեկ անգամ հաստատում է այն փաստը, որ Ընթացակարգի հրավերի Տեխնիկական բնութագրի համաձայն՝ արտադրողի կողմից տրված նամակ-հավաստագիրը ներկայացվում է մատակարար ընկերության կողմից՝ ապրանքը մատակարարելիս:

Օրենքի 5-րդ հոդվածի 1-ին մասի 4-րդ կետի «ա» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում ավելի քան մեկ անգամ խախտել է գնման գործընթացի շրջանակում ստանձնած պարտավորություն, որը հանգեցրել է գնման գործընթացին տվյալ մասնակցի հետագա մասնակցության դադարեցմանը:

Խորհուրդն, ուսումնասիրելով «Պրոֆիլայն Էռ Էմ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու վերը նշված հիմքերը, գտնում է, որ Ընկերությունը ՀՀ դատական դեպարտամենտի կողմից կազմակերպված «ԴԴ-ՇՀԱՊՁԲ-15/8-05/17» ծածկագրով ընթացակարգի շրջանակներում

թույլ չի տվել «Գնումների մասին» ՀՀ օրենքի 5-րդ հոդվածի 1-ին մասի «ա» ենթակետով նախատեսված՝ գնման գործընթացի շրջանակում ստանձնած պարտավորության խախտում, քանի որ Ընկերությունը Ընթացակարգի տեխնիկական բնութագրով նախատեսված նամակ-հավաստագիրը Կարգի 47-րդ կետի 2-րդ ենթակետով նախատեսված փուլում ներկայացնելու պարտավորություն դեռևս չի կրել, հետևաբար Ընկերությանն այս հիմքով գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

Հայաստանի Հանրապետության ֆինանսների նախարարության 02.05.2017թ. թիվ 03/73-3/7522-17 և 03/73-3/7523-17 գրություններով «Պրոֆիլայն Էո Էմ» ՍՊԸ-ին (ՀՎՀՀ՝ 01267718) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ՄՀԵՐ ԱՆԱՆՅԱՆ